

01 AUG 1997

DR MAHATHIR ADAKAN PERBINCANGAN DENGAN NAWAZ

KUALA LUMPUR, 1 Ogos (Bernama) -- Perdana Menteri Pakistan Nawaz Sharif mengadakan pertemuan dengan Datuk Seri Dr Mahathir Mohamad di pejabat Perdana Menteri di sini pagi ini.

Kedua-dua Perdana Menteri kemudian mengetuai delegasi masing-masing bagi mengadakan perbincangan.

Malaysia diwakili antara lain Menteri Luar Datuk Seri Abdullah Ahmad Badawi, Menteri Perusahaan Utama Datuk Seri Dr Lim Keng Yaik, Menteri Perdagangan Antarabangsa dan Industri Datuk Seri Rafidah Aziz dan Timbalan Menteri Dalam Negeri Datuk Tajol Rosli Ghazali sebagai Menteri Pengiring.

Anggota delegasi Pakistan termasuk Menteri Luar Gohar Ayub Khan, Menteri Perdagangan Muhammad Ifhaq Dar dan Menteri Kewangan Sartaj Aziz.

Kedua-dua Perdana Menteri akan menyaksikan majlis menandatangani perjanjian antara Inno-Enhance Sdn Bhd, kerajaan Punjab dan Lembaga Perindustrian Punjab untuk mewujudkan zon pemprosesan eksport di Pakistan.

Satu memorandum persefahaman mengenai kerjasama pertahanan antara kedua-dua negara akan turut ditandatangani. Malaysia akan diwakili Ketua Setiausaha Kementerian Pertahanan Datuk Azizan Husain sementara Pakistan diwakili Setiausaha Pertahanan Lt Jen Iftikhar Ali Khan.

Nawaz tiba semalam untuk lawatan rasmi tiga hari bertujuan meningkatkan kerjasama dua hala. -- BERNAMA

AZZ RON